

李文恭公遺集

李文恭公奏議卷九目錄

湘陰李星沅石梧著

男

概棟

編次

蘇撫

恭報到江蘇巡撫任並陳地方情形摺子

附奏委署藩臬兩司片子

附奏糧艘回空情形片子

奏報江浙漕船全數進口摺子

奏參浙江領運千總摺子

覆奏松江重運渡江毋庸另立一限摺子

附奏松江重運實情片子

知府試用期滿循例甄別摺子

查明江淮等屬熟田舊欠錢糧請分別緩徵摺子  
奏請開復華亭縣常恩等頂戴摺子

勘估徒陽運河挑工摺子

彙奏編查保甲完竣摺子

附奏並無私鑄及行使小錢片子

恭謝

頒賞福字摺子

請將包漕衿戶革審摺子

驗收徒陽運河工程並催提重運漕船渡江摺子

籌議上海招商買米由海運津摺子

附奏江蘇藩司稟請展假調理片子

附奏升任臬司暫緩交卸片子

審擬開賭窩娼棍徒並得規包庇兵役摺子

追補江蘇省三次清查案內第二十限完欠銀數

摺子

奏請給還吳縣李蒙泉等頂戴摺子

附奏畱省知縣飭令到任片子

奏請湊撥兵餉摺子

特參疎防盜案各員摺子

奏請開復宜興縣謝克一頂戴摺子

附奏現辦清查大概情形片子

恭報到江蘇巡撫任竝陳地方情形摺子

奏爲恭報

微臣

抵省接印日期竝陳地方現在情形

仰祈

聖鑒事竊臣本年十一月初旬入覲

天顏疊蒙

召見仰荷

鴻慈踰量策勉優加凡立身行政之方察吏安民之要  
以及海防漕運練兵弭盜諸大端備邀

李文恭公奏議

卷九

蘇撫

恩訓提撕洪纖畢舉跪聆之下感激服膺

陛辭後兼程赴任計期徒陽運河應飭上緊估挑遂於  
十二月初二日馳抵京口勘工築壩初十日始至

蘇州省城淮護撫臣委員賚送巡撫關防

王命旗牌卷宗等件前來臣謹卽恭設香案望

闕叩頭祇領視事伏查江蘇政務繁難疲敝久在

慈鑒之中臣前任兩司閱時未久以今視昔盤錯滋深

如通省人材亦多有爲有守惟終歲心力畢注錢



漕他務幾不遑及年來銀貴錢賤辦理逾覺周章  
其懦者委之丁胥其黠者巧於緣飾缺固累人人  
復累缺中材以下靡然從風則吏治亟宜勸懲也  
江蘇財賦之區課額較重而幅員所限歲事不常  
時有偏災漸形積困近以海氛初息閭閻元氣尙  
虧物力之艱用每患其不足逐末者衆粟又患其  
有餘穀賤傷農雖豐亦匱催科撫字事在兼權則  
民生亟宜體恤也從前江北多盜淮徐一帶曳刀

行強近則江南內河亦頗竊劫有案湖深港曲四  
路可通又募勇日久無歸流而爲盜此拏彼竄甚  
至持械拒捕愍不畏法若非繩以重典良善何由  
而安則緝捕不可不嚴也臣標額兵六百餘名卽  
合城守營計之爲數仍少且省會重文不重武弁  
丁能逸不能勞或掛名當差或借糧餉口極其流  
弊恐至兵與器不相習而兵皆惰游將與兵不相  
習而將皆閒散不獨臨陣未可用就令緝匪亦無

功則訓練不可不勤也至若上海互市守前約必善後圖省局清查杜新虧必追舊欠當事幾之叢集皆疆吏所仔肩臣以庸愚渥膺

重寄深懼弗克負荷惟當竭誠殫力勉爲其難與督臣

壁昌隨時酌商和衷共濟去弊先其太甚立法要在必行不敢輕議更張尤不敢稍避嫌怨以冀上

酬

高厚生成於萬一所有微臣抵省接印日期竝地方現

在情形理合繕摺恭謝

天恩伏乞

皇上聖鑒謹

奏 道光二十五年十二月初十日具

奏奉

硃批朕看汝年富才明學優品正甚有厚望於汝諒汝亦必能體朕用人之苦衷也勉益加勉毋怠毋忽欽

此

附奏委署藩臬兩司片  
子

再臣行次鎮江卽聞護撫臣布政使文柱肺痛痰喘頗形委頓亟抵蘇垣接晤察其病體實由氣弱積勞形神瘦怯非靜養難期速愈已由該司自行具摺奏請

賞假調理臣查現署藩司按察使郭熊飛署臬司鹽巡道積喇明阿均經歷署斯篆練悉情形應仍飭令接署以資熟手合併附片上

聞謹

奏

硃批依議欽此

附奏糧艘回空情形片子

再本年糧艘回空較遲浙幫甫經渡江適京口水勢阻淺經護撫臣循案

奏明改由橫閘行走臣途次聞信十分焦急卽於本月初二日趕至江口先行督勘煞壩隨駐丹徒橫閘嚴飭鎮江府縣及文武各委員晝夜迎提並押令各幫起卸貨物以利遄行又值西北風大內河凍結練湖向可濟運亦皆一片冰凝重陰沍寒爲

近年所未有閘水頓形消耗門高於江必藉潮汎  
浮送臣以江湖隨風長落無定天愈冷則潮愈弱  
斷不容諉諸天時致有從前回空畱在江外過年  
之事亟令多集人夫再行挑淺挖深并用絞關挽  
拽先備敲冰船械隨到隨行截至初七日止始得  
開口進船二百八十六隻連前共進口船一千六  
百八十三隻計浙幫未進口者尙有三百餘隻仍  
飭上緊如法一律提催刻不容緩務令卽日掃數



進聞僭程南下無誤歸次容再另行

奏報至臣所過直隸山東等處及江南境內均皆雪

澤普霑民情安謐洵足仰慰

聖懷謹

奏

硃批知道了又於一律提催句旁奉

硃批上緊催僭不可遲延又於雪澤普霑句旁奉

硃批覽奏雖堪欣悅但京師亟盼雪澤優霑也欽此

奏報江浙漕船全數進口摺子

奏爲江浙兩省回空漕船全數進口催令趕緊歸次  
恭摺奏祈

聖鑒事竊照近年重運漕船回空節經欽奉

上諭着該漕督及沿途各督撫分飭所屬嚴行催儻等

因本年回空南下先經前護撫<sub>臣</sub>督飭文武員弁

催令儻進京口嗣因水勢阻淺改道橫閘<sub>臣</sub>於行

抵鎮江時卽經駐閘守催旋又分委幹員多方提

挽計先後催進江浙幫船一千六百餘隻業將辦理情形奏

聞在案祇以歸次喫緊爲日無多所有已進京口淺閣之船及未進橫閘船隻或車水運送或刨槽灌塘或用關纜人夫并力拉拽或將練湖起放引水歸河凡有可以濟運之方均飭印委各員遵照臣所指示刻卽舉行茲據常鎮道及鎮江府等稟報截至十二月十八日統共江浙兩省幫船及先在鮎

魚套停泊之鎮江前後兩幫計二千一百四十四  
隻業已掃數進口臣復嚴飭沿河各員逐段打冰  
押催務令迅速銜尾歸次查本年進口日期較上  
屆雖有遲逾但幫船入境渡江節節較晚卽至改  
由橫間已經臘月大江潮汛枯弱內河水澤腹堅  
又連值西北風冰雪凍阻天時所限人力幾窮臣  
目擊情形惟恐回空不能全進致如從前畱在江  
外過年則新漕勢難趕早百計催提萬分焦慮幸

賴

聖王洪福得於年內一律進閘水手人等亦皆安靜無事可期新漕早兌早開所有在事各員催儻奔馳雖係分所當盡惟本年由閘船數多於上屆且天氣之寒水勢之小時候之迫均非往年可比一切蓄水儻運事宜該員等晝夜籌催不遺餘力究有微勞足錄現在運河卽須興挑應責成一手趕辦如果始終勤奮來春重運較常年及早渡江容再

會同督臣擇其尤爲出力者酌量保

奏恭候

恩施所有江浙回空漕船全數進口日期謹會同兩江  
總督臣璧昌恭摺

奏報伏乞

皇上聖鑒謹

奏 道光二十五年十二月二十日具

奏奉

殊批知道了欽此

奏參浙江領運千總摺子

奏爲浙江回空幫船多帶貨物不遵起卸請

旨將押運千總摘去頂帶恭摺具

奏仰祈

聖鑒事竊照本年回空軍船爲時較晚兼值天氣嚴寒  
西風刮刷卽橫閘底水亦甚消耗臣於行次鎮江  
時親督該府縣暨委員等設法籌催不遺餘力業  
將續催進口船數附片



奏明在案抵任後連日分委幹員星夜馳往會同地方官查照臣所指示相機催挽刻不容緩仍嚴飭各幫將貨物起卸淨盡以便進行茲據鎮江府稟督同印委各員分駐開口遵將淤淺處所挑挖深通挽拉人夫亦已齊集十五日早潮汛到先有一船進口次至台後幫旗丁楊寶連船隻竭力絞挽不能行走卽經委員上船查起貨物甚多致有延閣在後各船晚潮始能進聞已將該旗丁等分別

枷責等情接閱之下不勝焦灼查幫船卸貨攢運  
早已三令五申且經丹徒縣多雇剥船專備卸載  
當萬分緊急之際乃楊寶連船隻仍復抗不遵辦  
以致稽延時日阻壓後船該幫押運千總恩魁本  
有稽查之責似此漫不經心實屬無可辭咎現在  
浙幫雖已掃數進鬧而該弁督率無方非特參不  
足示儆相應請

旨將浙江台州後幫空運千總恩魁摘去頂帶留淮差

遣以觀後效謹會同兩江總督臣壁昌漕運總督  
臣程裔采恭摺具

奏伏乞

皇上聖鑒謹

奏 道光二十五年十二月二十日具

奏奉

硃批另有旨欽此內閣奉

上諭李星沅奏浙江回空幫船多帶貨物不遵起卸請

將押運千總摘去頂帶一摺浙江台州後幫旂丁楊寶連船隻裝載貨物甚多以致延閣不能行走阻歷後船該幫押運千總恩魁稽查不力咎無可辭恩魁著交漕運總督棍責斥革以示懲儆欽此

覆奏松江重運渡江毋庸另立一限摺子

奏爲遵

旨會同核議仰祈

聖鑒事前准戶部咨開內閣奉

上諭潘錫恩奏籌備空運事宜並請定松江府屬重運  
渡江限期一摺著壁昌程爾采陳繼昌會同核議具  
奏等因欽此遵卽恭錄咨行並飭江蘇藩司蘇松糧  
道會議詳覆前來臣等往返函商悉心確核伏思

南漕爲

天庾正供冬兌春開由來已久例應迅速挽運早達通  
倉松江重運幫船向與蘇屬各幫糧船跨兌必先  
蘇而後松又由吳淞黃浦泖湖運河迤邐出江連  
年比較遲早不過數日從無延悞此時若另立一  
限刻期渡江亦只上緊催趲別無求速之法恭查  
渡黃

欽限務於四月初十日以前全漕抵壩各省漕運凜遵

歷有年所近因漕務繁重幾成具文果能節節提  
前漸歸初限實爲萬全無患所有松江重運相距  
不遠尤當爭先恐後一律過速率由舊章趕符渡

黃

欽限其渡江日期自可不疾而速應無庸另立一限以  
歸簡要臣等惟當先事籌度嚴切督催俾漕米及  
早兌交糧艘及早開運如縣幫稍形玩易立即指  
名撤參刻不容緩務較常年提前辦理有速無遲

勉行

聖主厘念漕糶之至意所有臣等會同核議緣由謹合  
詞恭摺具

奏伏乞

皇上聖鑒訓示謹

奏 道光二十五年十二月二十日具

奏奉

硃批另有旨欽此內閣奉



上諭前據潘錫恩奏籌備空運事宜竝請定松江府屬  
重運渡江限期一摺當交壁昌等覈議具奏茲據奏  
稱松江重運幫船向與蘇屬各幫糧船跨兌必先蘇  
而後松又出吳淞黃浦泖湖運河迤運出江連年比  
較遲早不過數日從無延悞况渡黃例限本定於四  
月初十日以前果能節節提前漸歸初限所有松江  
重運相距不遠尤當爭先恐後一律遄速又另片詳  
陳松江重運實情惟在破除積習多方激勵各等語

所議自係詳加體察務協機宜所有松江重運渡江  
卽著無庸另立限期以歸簡易該督等仍當先事籌  
度嚴切督催俾早兌早開如縣幫稍形玩易卽指  
名撤參務較常年提前辦理以符例限而利漕行欽

此

附奏松江重運實情片子

再查松江海濱沙土每以木棉爲生計所種稻米無多收穫較晚偶值歉歲更須買米交倉是以松屬各幫向來派列江蘇之末此樹藝之不同也松幫與蘇屬跨兌必先蘇而後松又自水次開行距鎮江五六百里所過之處汎有大小湖有淺深必得候潮趨行徧插標記偶爾歧誤難免耽延此運道之不同也松屬向稱膏腴近來物力多艱地方

元氣未復又疊次捐輸如海塘工程及防堵保衛各局率多匱勉急公民力不無拮据且紋銀洋錢價日昂制錢糧石價日賤農夫終歲勤動以米易錢所得幾何完漕倍形竭蹶又歷年松屬漕運多係江淮興武兩幫該幫丁向無屯田光景較苦以較苦之幫領極重之運州縣賠墊日累則以津貼爲多弁丁耗費之增則以津貼爲少往往屆期爭執積重難返弊且甚於蘇州此事會之不同也要

之免開程限惟在破除積習多方激勵認真督催  
縣幫同一積疲無可姑容亦無可偏護總以禁止  
令行爲斷若專立渡江限期則未到限以前効之  
太早旣逾限以後効之又遲與其定限而轉致周  
章莫若嚴催而隨時懲儆總期於渡黃之限儘力  
提前雖天時人事之不齊勢難操切而

國計民生之竝重務協機宜臣等責任攸歸較之河

臣尤爲切近但能速益求速焉敢不知緩急稍涉

顓預謹將松江重運實情再行附片密陳伏乞

聖鑒謹

奏  
道光二十五年十二月二十日附

奏

硃批另有旨欽此

知府試用期滿循例甄別摺子

奏爲知府試用一年期滿循例甄別恭摺具

奏仰祈

聖鑒事竊查定例捐納道府循例簽掣分發者試用一  
年期滿後該督撫察看才具分別堪勝繁簡專摺  
奏

聞照例題補外其有才具平常卽嚴行甄別等因歷經  
遵辦在案茲查試用知府許榘現年四十八歲浙

江進士以知縣卽用簽掣直隸

奏准留館纂修志書告成奉

旨著以知州儘先選用選授山東平度州知州嗣因山東捐輸海疆經費案內彙摺保

奏道光二十三年三月初五日奉

旨著以知府投効江蘇補用仍賞加二級欽此請咨赴

部引

見奉



旨著照例發往欽此於二十四年五月十五日給照十  
二月初二日到省照例歸於初六日掣簽是月並  
無同班同月到省人員無庸簽掣名次應卽以掣  
簽之日作爲到省日期今扣至二十五年十二月  
初六日試用一年期滿據江蘇藩臬三司詳請甄  
別會

奏前來臣等查該員年壯才明辦事穩練堪勝繁缺  
知府之任謹合詞恭摺具

奏伏乞

皇上聖鑒謹

奏 道光二十五年十二月二十七日具

奏奉

硃批吏部知道欽此

查明江淮等屬熟田舊欠錢糧請分別緩徵摺子  
奏爲查明江淮等屬熟田舊欠錢糧未能同時並納  
仰懇

聖恩分別緩徵以紓民力事竊照道光二十五年江甯  
等府州屬除水旱歉收之區應帶舊欠錢糧業經  
前護撫臣奏蒙

恩准緩徵外所有熟田節年舊欠錢糧例應按限啟徵  
前據各屬以頻年積歉民力維艱詳請分別遞緩

當於秋災摺內聲明另行專案具

奏一面飭司核實勘辦茲據署江甯布政使查文經  
轉據該管府州各就所屬地方體察情形核明應  
緩年款詳請具

奏前來臣等伏查道光二十五年江甯淮安揚州徐  
州海州通州等府州屬應徵熟田舊欠內除揚州  
府屬之寶應縣徐州府屬之沛縣各年舊欠錢糧  
均係坐落本年歉區竝無應行帶徵外其餘各州

縣熟田舊欠錢糧凡應行起徵者業已分別剔除  
仍令照常徵收不准藉詞拖延此外各款或因毗  
連歉區或因頻年積歉若以一歲之所收完納數  
年之逋欠民力實有未逮既據該管府州覆加體  
察由司查無捏飾自應准其分別遞緩以恤民艱  
除道光十一年起至二十年止舊欠錢糧歸於豁  
免案內辦理外合無仰懇

天恩俯准將上元江甯句容溧水高淳江浦六合山陽

阜甯清河桃源安東鹽城高郵泰州東臺江都甘泉儀徵興化銅山豐縣蕭縣碭山宿遷睢甯海州沭陽泰興等州縣並揚州衛頭儀兩幫道光二十一年起至二十四年止舊欠地漕屯折蘆課漕價等項同節年加津津貼增租銀兩除請徵外其餘未完各年災熟各款銀米穀麥豆石概請緩至道光二十六年秋後分別啟徵以紓民力其淮安大河徐州三衛屯田應隨同坐落州縣一律辦理除

將請緩年款咨明戶部并飭查造應徵應緩銀米  
確冊另行詳咨外謹合詞恭摺具

奏伏乞

皇上聖鑒訓示至溧水高淳江浦六合儀徵興化豐縣  
泰興等縣今秋雖未被歉而收成減色且係歷被  
災歉之區民情困苦是以將舊欠錢糧彙入各屬  
緩徵案內一律查辦合並陳明謹

奏 道光二十五年十二月二十七日具

奏奉

硃批另有旨欽此內閣奉

上諭壁昌等奏查明江淮等屬熟田舊欠錢糧請分別  
緩徵一摺江甯淮安等屬熟田舊欠錢糧或因毗連  
歉區或因頻年積歉若同時并徵民力恐有未逮加  
恩著照所請所有上元江甯句容溧水高淳江浦六  
合山陽阜甯清河桃源安東鹽城高郵泰州東臺江  
都甘泉儀徵興化銅山豐縣蕭縣碭山宿遷睢甯海



州沐陽泰興等州縣并揚州衛頭儀兩幫道光二十一年起至二十四年止舊欠地漕屯折蘆課漕價等項同節年加津津貼增租銀兩除應徵外其餘未完各年災熟各款銀米穀麥豆石均著緩至二十六年秋後分別啟徵以紓民力其淮安大河徐州三衛屯田著隨同坐落州縣一律辦理該督等卽刊刻謄黃徧行曉諭務使實惠及民毋任吏胥舞弊用副朕軫念歉區至意該部知道欽此

奏請開復華亭縣常恩等頂戴摺子

奏爲知縣經徵上忙錢糧已經完解請

旨分別開復頂帶註銷原案仰祈

聖鑒事竊照前署華亭縣知縣常恩現任荆溪縣知縣  
尹宗淳又另案革職之前署丹陽縣知縣馮颺經  
徵道光二十五年上忙地丁錢糧完解不前業經  
前署撫臣等會摺

奏請分別摘頂勒令趕解在案茲據署蘇州布政使

郭熊飛詳稱該三縣短解銀兩於

奏參後趕緊陸續解完尙知愧奮請將常恩尹宗瀆  
開復頂帶並將馮颺參案註銷等情先後詳請具  
奏前來臣查常恩等短解上忙地丁於被參後卽行  
完解與始終怠玩者有間相應恭懇

聖恩將前署華亭縣知縣常恩現任荆溪縣知縣尹宗  
瀆先行開復頂帶以觀後效並將前署丹陽縣  
知縣馮颺原參之案註銷至宜興縣短解上忙銀

兩亦經彙案

奏參仍卽勒催迅速批解另行核辦謹會同兩江總

督臣壁昌恭摺具

奏伏乞

皇上聖鑒訓示謹

奏 道光二十五年十二月二十七日具

奏奉

硃批另有旨欽此內閣奉

上諭李星沅奏知縣經徵錢糧已經完解請分別開復  
頂帶註銷原案一摺前署江蘇華亭縣知縣常恩現  
任荆溪縣知縣尹宗瀉均著准其開復頂帶前署丹  
陽縣知縣馮颺原參之案并准其註銷餘依議該部  
知道欽此

勘估徒陽運河挑工摺子

奏爲勘估徒陽運河挑撈工段銀數恭摺具

奏仰祈

聖鑒事竊照鎮江府屬丹徒丹陽二縣運河爲江浙漕  
船經由要道該處水無來源全藉江潮灌注而潮  
汐挾沙易於停滯定例每年於回空幫船過竣後  
小挑一次屆至六年大挑一次本年輪屆小挑惟  
夏秋雨澤稀少交冬後底水消耗是以回空頓形

淺滯臣於行抵鎮江時因幫船已改道橫開卽將江口大壩先行督令簽椿竝將河道淺涸處所逐一親勘必須格外挑挖深通以期無誤重運當卽飭委熟悉工程之候補知府李正鼎候補直隸州嚴達會督該府縣等俟各幫出境後卽將應挑應撈工段核實覆勘摺節估計毋稍浮冒草率茲據常鎮道及鎮江府等稟報督同丹徒丹陽二縣逐段查勘自江口壩起至丹徒橋止河長三千七百

六十五丈均屬淤淺應行築壩開挑又各段內有  
陽灘挺入河心共長九百九十丈全行估切又江  
口門東壩下等二十一處共長三千二百九十丈  
俱應估撈統計挑撈築壩切灘並更換閘板繩索  
等項共估需銀一萬五千二百五十九兩二錢三  
分八釐又丹陽縣境自中心河起至小南門河長  
八百丈極形淤墊應行築壩開挑其餘定山灣等  
二十八處共長一千五百八十丈俱應估撈共估



需銀二千六百八十七兩七錢二分四釐此外尙有淤淺之草堰橋等處責令該縣自行挑辦合計兩縣各工估需銀一萬七千九百四十六兩九錢六分二釐由署蘇州布政使郭熊飛查明此項挑河工價除動支丹徒縣樂生洲租息銀五千八百一十二兩零餘銀循例於司庫存公等款銀內動支給辦等情前來臣抵任甫及旬餘一切移交案件竝年終緊要公事均須趕緊清釐且先經督同

該府縣順道周歷履勘茲已援照成案飭委署常  
鎮道陳熾就近再加勘核趕煞尾壩將原估各工  
逐段標立誌樁加封灰印竝於兩岸各立暗記造  
冊備查以防弊混責成該道及李正鼎等隨時稽  
查鎮江府知府沈濂親駐工所嚴督印委各員按  
照估定尺寸核實督夫挑撈迅速蒞事不准藉詞  
延誤仍於挑工完竣未經起壩以前預行稟報候  
臣親往驗收如與原估標誌不符卽查明挑挖實

在寬深若干核扣多餘銀數罰令賠補一面據實  
奏參總期一律深暢俾利漕行除飭取挑撈運河土  
方夫工細冊分別

題咨外所有勘估工段銀數謹會同兩江總督臣壁  
昌恭摺具

奏伏乞

皇上聖鑒謹

奏 道光二十五年十二月二十七日具

奏奉

硃批另有旨欽此內閣奉

上諭李星沅奏勘估徒陽運河挑工一摺江蘇徒陽運河爲江浙漕船經由要道旣據該撫委勘河身淺涸自應趕緊挑挖所有估需銀一萬七千九百四十六兩零除動支丹徒縣樂生洲租息銀五千八百十二兩零外餘銀准其於司庫存公等款內動支給辦卽責成該署道陳熾等隨時稽查該府沈濂親駐工所

嚴督印委各員照估如式督挑迅速蒧事工竣由該  
撫核實驗收倘有草率延誤卽著據實嚴參餘著照  
所議辦理該部知道欽此

彙奏編查保甲完竣摺子

奏爲編查保甲完竣飭取連名互保各結循例恭摺  
彙奏仰祈

聖鑒事竊照各州縣應於秋後將戶口逐細查明取具  
互保甘結填寫門牌按戶懸掛由該管各上司遞  
加查核具詳督撫於歲底彙奏一次歷經遵辦在  
案嗣屆道光二十五年查辦之時經前護撫臣文

柱通飭各道府州認真督率稽查去後茲據署臬

司積喇明阿會同署江蘇兩藩司查文經郭熊飛  
詳據各廳州縣將保甲戶口及棚民人數先後查  
竣取具里甲長竝無容留匪類連名互保甘結陸  
續詳經各道府州親往抽查竝無錯漏由臬司委  
員分赴各州縣覆查牌冊相符加結送司詳請具  
奏前來伏查江蘇地方沿江濱海水陸交衝五方雜  
處匪徒最易托足如上海之閩廣游民蘇松常鎮  
之土匪棚民淮揚徐海之捻匪鹽梟與跟隨漕船

附奏竝無私鑄及行使小錢片子

再各州縣境內有無私鑄及行使小錢應於年終  
出具印結詳報督撫具

奏一次歷經通飭各屬嚴行查禁責成各廳州縣隨  
時訪拏究辦在案今屆道光二十五年分查辦之  
期又經前護撫臣飭屬嚴查去後茲據署江甯布  
政使查文經署蘇州布政使郭熊飛署江蘇按察  
使積喇明阿查明江蘇省各廳州縣境內現無私



鑄及行使小錢情事出具印結詳

奏前來臣覆查無異除再嚴飭所屬文武隨時明查  
暗訪如有前項私鑄人犯卽行嚴拏懲辦斷不准  
視爲具文稍有懈弛所有道光二十五年分江蘇  
省各屬現在查無私鑄及行使小錢緣由理合會  
同兩江總督臣壁昌附片具

奏伏祈

聖鑒謹

奏

硃批知道了欽此

恭謝

頒賞福字摺子

奏爲恭謝

天恩事竊臣賫摺差弁回蘇捧到

恩賞

御書福字一方臣當卽恭設香案望

闕叩頭祇領欽惟我

皇上昭景崇釐

李文恭公奏議

卷九

蘇撫

三五

撫辰納祿

乾符建極平康普

敷錫之恩

泰運開韶戩穀上罄宜之祝仰

龍光之下逮值鳳紀之方新臣忝任封圻毫無報稱渥

荷

寵榮於獻歲疊邀

宸翰於

均視丙馭年長寅律則

珠綸衍慶午垣日麗

申麻則

寶字揚華

綏茀履以斟元

堯衢集祐協龐禩而

布惠

軒管頌春飮被

李文恭公奏議

卷九

蘇樵

三六

鴻施益深齎戴

天題錫羨式符百順以迎祥星好臚懽願合三吳而樂

凱所有

微臣

感抃下忱理合繕摺恭謝

天恩伏乞

皇上聖鑒謹

奏  
道光二十六年正月十六日具

奏奉

硃批知道了欽此

請將包漕矜戶革審捐子

奏爲在籍知縣武舉被控朋充經造攬納漕糧提訊  
供詞狡展請

旨暫行革審恭摺奏祈

聖鑒事竊照蘇省漕糧甲於天下祇以花戶自分大小  
完數遂有短長因之兜納把持羣趨利藪現在辦  
漕之難如蘇州府屬之常熟縣視各屬爲尤甚

臣

於莅任後亟圖整頓訪聞該縣漕務積弊內有不

肖矜監包攬小戶短交肥己且於經造一役詭名  
朋充以肆刁抗之計復飭承檢查檔案上年八月  
曾據昭文縣民陳增以監生蔡五舉人蔡三蔡四  
武舉浦登彪浦登鰲浦登奎等朋充攬納等情赴  
京呈控咨回審辦因蔡五等屢提未到案懸莫結  
卽經飭委幹員馳往該縣密訪查拏旋據稟獲浦  
登彪並將蔡廷熊卽蔡三先後押解到省發委蘇  
州府提訊據該員等供認短數完漕包攬小戶屬



實惟於朋充經造歷年勾串侵吞等弊情詞均多  
閃爍自係恃符狡展查蔡廷熊由舉人出身曾任  
直隸獻縣知縣浦登彪係昭文縣武舉相應奏明  
請

旨將前任直隸獻縣知縣蔡廷熊暫行革職武舉浦登  
彪暫行斥革以便提同蔡五等及經書人等到案  
研訊明確照例懲辦如有要證抗匿并此外著名  
漕棍均隨時嚴拏重究以挽澆風至該縣應徵漕

米疊經飭令秉公迅速徵收總期大小適均兌開  
如限倘官吏辦理不善以致苦累小民亦卽查明  
參處不敢稍有偏徇謹會同兩江總督臣璧昌恭  
摺具

奏伏乞

皇上聖鑒訓示謹

奏 道光二十六年正月十六日具

奏奉

硃批另有旨欽此內閣奉

上諭李星沅奏在籍知縣武舉被控朋充經造攬納漕糧請暫行革審一摺前任直隸獻縣知縣蔡廷熊著暫行革職武舉浦登彪著暫斥革交該撫提同全案人證研訊明確照例定擬具奏欽此

驗收徒陽運河工程並催提重運漕船渡江摺子  
奏爲驗收徒陽運河小挑工程並催提重運漕船渡  
江緣由恭摺奏祈

聖鑒事竊照鎮江府屬丹徒丹陽運河爲江浙漕船經  
由要路道光二十五年輪屆小挑適冬令水耗空

船改由橫閘臣甫行抵鎮江先將江口大壩督令

簽椿並親勘運河淺涸處所飭委候補知府李正  
鼎等會督該府縣核實估挑並委署常鎮道陳熾

就近覆勘趕煞尾壩業將勘估工段銀數奏蒙

聖鑒在案新正天氣晴霽按日程工向來挑河人夫均

由縣差夫頭承雇每多剋扣工資夫不足額以致

挑工遲緩此次經臣預定章程嚴飭該道府暨印

委各員破除積弊實力督挑查有夫數短缺卽行

重懲補足旋據稟報各工完竣臣於二月初一日

自蘇起程馳赴工次由丹陽至江口逐段量驗所

挑寬深丈尺均與原估相符撈淺各工亦皆如式

尙無草率偷減情弊據委員等面稟間段挑出石  
碑木椿等物實從前所未見詢之附近居民衆論  
僉同全工驗畢後隨於二月初四日將江口大壩  
起放鋪水目擊江流下注勢甚通暢所有派列首  
進之鳳中常幫重運漕船先已開抵壩口當經催  
令出江揚帆北上仍飭該道府嚴督該縣等將蓄  
水濟運事宜隨時認真籌辦不准置身事外如重  
運一律迅速再當查照前奏擇其尤爲出力者據

實奏請

恩施臣卽自鎮回蘇催提在後各幫趕緊跟接兌開以副渡黃

欽限不任稍有延誤謹會同兩江總督臣璧昌合詞恭摺具

奏伏乞

皇上聖鑒謹

奏 道光二十六年二月十二日具

奏奉

硃批知道了欽此



籌議上海招商買米由海運津摺子

奏爲上海地方現議招商買米由海道運赴天津售  
賣以裕民食而利轉輸恭摺奏祈

聖鑒事竊照京師爲

畿輔重地倉庾尤積貯要區欲求裕

國之方先議足食之策前經部臣奏准有漕省分官

員捐米章程上年復經奏奉

諭旨飭令妥協籌辦查閱原奏內有現議招商海運一

語江蘇地處海隅現值銀貴錢賤糧價平減之時  
似可相輔而行以補捐輸之不逮卽經諄飭蘇松  
太道督同該廳縣妥議試行去後茲據該道等轉  
據該商王學敏等具稟向有沙船赴奉天等處買  
易現愿備價收買米五萬石運往天津售賣由該  
道議請給予執照將江海天津兩關稅銀免其輸  
納仍俟事竣將照繳銷並以天津海口相距市廛  
尙遠所有雇用剝船繹夫請咨直隸督臣飭令地

方官出示曉諭毋任勒索一俟運到卽由該處米  
行按照市價糶賣仍嚴禁牙儉畱難羈阻如一時  
不能銷售由地方官按數收買等情會同蘇藩司  
詳請具

奏前來臣等伏查該商等自置沙船於海道最爲熟  
悉既據稟請運米前赴天津售賣於近

畿民食洵屬有裨惟當創始試行自宜曲加體恤尤  
應嚴防流弊所請給照執運似無偷漏之虞卽免

納稅銀以及示禁畱難勒索諸務亦爲商民兩便起見至地方官按數收買一節雖倉儲藉可充盈而庫款能否挹注應由直隸督臣體察情形酌量辦理如果運行有效在該商民等自必爭先恐後踴躍轉輸卽將來捐米之員亦可雇令帶運交納較之派幫搭運者尤覺簡便易行實於

國計民生大有濟益第念該商等買遷有無雖與捐米不同而往返經涉重洋究有微勞足紀應請仿

照旗丁加裝米石之例查明運數較多之商奏懇  
天恩量予鼓勵以示激勸現值南風漸起春水方生該  
商等定於二月內領照出洋仍俟回棹後查明經  
理是否妥善另行籌議經久章程奏請

訓示遵行除咨明戶部直隸督臣外謹合詞恭摺具  
奏伏乞

皇上聖鑒謹

奏 道光二十六年二月十二日具

奏奉

硃批戶部知道欽此

附奏江蘇藩司稟請展假調理片子

再蘇州布政使文柱前因嗽久痰多致傷肺氣當  
於交卸護撫篆時奏蒙

賞假一月調理茲據該司稟稱請假後百法求痊無如  
病體虛損痰喘仍未輕減一時驟難回任復請乞  
恩展假前來合無仰懇

鴻施俯准該藩司展假一月俾得再加調攝就痊回任  
供職謹合詞附片具

奏伏乞

聖鑒謹

奏

硃批另有旨欽此內閣奉

上諭壁昌等奏藩司患病未痊懇請展假文柱著再賞  
假一月調理欽此



附奏升任臬司暫緩交卸片子

再江蘇臬司郭熊飛奉

旨陞授直隸布政使應卽交卸迎摺北上惟該司現署蘇州藩篆本任藩司文柱因病未痊已另行

奏請展假且值查辦豁免催漕喫緊之際該司熟悉情形未便以爲日無多遽易生手自應俟藩司文柱病痊回任抑俟新任臬司周祖植來蘇接署藩篆再行飭令交卸以專責成理合附片陳明伏乞

聖鑒謹

奏

硃批依議欽此

審擬開賭窩娼棍徒並得規包庇兵役摺子

奏爲拏獲開賭窩娼擾害地方棍徒並得規包庇兵役審明分別定擬恭摺奏祈

聖鑒事竊照長洲常熟兩縣之居家圩陸巷地方有匪徒誘賭抽頭演唱花鼓及兵役得規包庇情事經前署撫臣陳繼昌督飭臬司郭熊飛暨長洲常熟二縣先後拏獲陸菊堂孫唐氏等數名將拏辦不力之營縣知府分別

奏參欽奉

諭旨署蘇州府知府桂文燿交部議處署長洲縣知縣  
韓倬章署常熟縣知縣金鎔黃埭汎把總劉兆勇一  
并革職畱任勒限掃數拏解嚴行究辦等因欽此卽  
經行司欽遵辦理旋據該府縣營將聚賭之顧寶  
如等及得規包庇之兵役按名拏獲解司飭據委  
員勘明居家圩官河一道東岸係長洲縣境西岸  
係常熟縣境顧寶如等均在東岸開賭陸金觀亦

在長洲縣境之陸巷開賭等情由署臬司積喇明  
阿督同候補知府許棟等審擬解勘聲明前獲之  
船戶吳阿六等四名係屬無干前來臣卽提犯親  
鞫緣顧寶如鮑奉莊卽鮑通淋陸金觀卽癡金金  
均籍隸長洲縣姜源胡耀充當長洲縣差捕陸菊  
堂充當刑書潘秋汀充當地總穆淮充當常熟縣  
皂役王勝係黃埭汛兵丁顧寶如素性兇橫不安  
本分道元二十三年三月二十八日起意商允鮑

奉莊聚賭抽頭卽在居家圩地方搭棚搖攤至五  
月底停止又於二十四年三月顧寶如商允鮑奉  
莊招留妓女演唱花鼓仍在原處開賭至六月初  
三日止繆漑見顧寶如開賭獲利亦於二十四年  
四月在顧寶如場上另桌搖攤計共聚賭八日停  
止鮑奉莊又於二十五年三月二十五日商同顧  
寶如開賭並招留花鼓女戲是年六月陸金觀亦  
在附近之陸巷地方開賭招留過路之戲妓孫唐

氏卽金姑娘並幼女阿六阿八演唱花鼓至八月  
初一日停止時有在逃之王雙觀將蔣陳氏抑勒  
賣姦之義女陸秀英帶往亦經陸金觀畱住抽給  
頭錢顧寶如鮑奉莊賭具係同賭之人攜往繆淮  
陸金觀賭具係向不識姓名擔上買來所得頭錢  
均不記確數往來人數無定亦不記姓名顧寶如  
初次開賭時因居民每向勸止輒與拚鬧并以如  
再阻撓卽行放火焚屋之言嚇制適金大全船隻

被竊疑爲顧寶如等聚賭所致卽赴臬司衙門喊稟押發長洲縣訊供飭拏顧寶如當央繆漑說合願賠洋錢五十元先付十元餘未找給金大全復赴前撫臣衙門具控批飭提究未到顧寶如又因王勝向其索詐三次送給洋錢六元錢二千文又有龔鳳書赴長洲縣控顧寶如聚賭飭差胡耀查拏胡耀向顧寶如索詐洋錢四元庇不到案迨二次開賭時正值姜源下鄉顧寶如慮及訪拏央允



照應許送錢文姜源旋卽遣夥沈富淋兩次查探  
顧寶如先後託交姜源洋錢六十元另送沈富淋  
洋錢二元並因與陸菊堂素識先後送給錢十千  
文菜油百斤囑爲關照又恐潘秋汀稟首兩次送  
錢十二千文胡耀又向顧寶如詐得洋錢四元嗣  
鮑奉莊商同顧寶如開賭時仍託姜源照應適值  
臬司示禁姜源卽向知會顧寶如等復給洋錢三  
十元沈富淋亦得錢五百文龔鳳書又欲出控顧

寶如等央潘秋汀調停送給洋錢九元旋復向詐  
顧寶如氣忿將其細縛並用牛糞塗污龔鳳書控  
經臬司批縣飭差胡耀催提胡耀復索得洋錢四  
元並未提案顧寶如等又送給龔鳳書洋錢二十  
元始行停歇戲賭卽經前署撫臣督同臬司訪聞  
飭拏先行

奏參據該府縣營將首要各犯及兵役人等按名拏  
獲由司督審詳解臣親提各犯研鞫據各供認前

情不諱究無另犯不法此外亦無開場聚賭及得規包庇之人刑嚇不移案無遁飾查例載兇惡棍徒行兇擾害發極邊足四千里安置又民人開場誘賭經旬累月放頭抽頭者初犯杖一百徒三年又拏獲賭博人犯不將造賣之人據實供出卽將出有賭具之人照販賣爲從例杖一百徒三年又窩頓流娼月日經久者杖一百徒三年又設計誘買良家之子爲優者枷號三個月杖一百徒三年

又枉法贓一十兩杖九十五兩杖一百流二千  
五百里無祿人減一等各等語此案顧寶如商同  
鮑奉莊迭次開場聚賭並招留花鼓女戲每遇居  
民向阻卽與拚鬧並欲放火焚屋復因龔鳳書欲  
控將其細縛塗糞其兇橫擾害實屬人所共知若  
照開場聚賭及窩頓流氓娼問擬滿徒殊覺情浮於  
法顧寶如應從重照兇惡棍徒行兇擾害例發極  
邊足四千里安置差役姜源得賄包庇一聞臬司

禁賭之信卽向顧寶如知會差役胡耀奉票查拏  
顧寶如得賄不拘均屬膽玩惟顧寶如並未脫逃  
未便照受財故縱與囚同罪律將該犯等同科棍  
徒擬軍之罪若僅照得規縱令開賭按賭博例擬  
以滿徒又覺輕縱自應酌量加等問擬姜源胡耀  
除計贓輕罪不議外均請於開場誘賭經旬累月  
杖一百徒三年罪上酌加一等各杖一百流二千  
里繆漣開場誘賭尙非經旬累月惟出有賭具不

將造賣之人供出除爲顧寶如向金大全說事過  
錢輕罪不議外應依賭博不將造賣之人供出卽  
將出有賭具之人杖一百徒三年例係差役知法  
犯法應加一等杖一百流二千里汎兵王勝地總  
潘秋汀均有應捕之責縣書陸菊堂雖無應捕之  
責乃皆得受顧寶如賄囑或不捕不首或允爲照  
應係屬受財包庇應同科顧寶如開賭之罪王勝  
潘秋汀陸菊堂除計賍輕罪不議外均合依開場

誘賭經旬累月例各杖一百徒三年鮑奉莊先則  
隨同顧寶如兩次開場誘賭抽頭漁利嗣復起意  
招畱女戲累月聚賭陸金觀出有賭具獨自經旬  
開賭抽頭並招畱女戲核其所犯各罪相等應從  
一科斷鮑奉莊陸金觀均合依開場誘賭經旬累  
月初犯例杖一百徒三年龔鳳書藉控嚇詐先後  
索得洋錢二十九元計贓十七兩零合依恐嚇取  
財者計贓准竊盜論加一等律於竊盜贓一十兩

杖七十律上加一等杖八十金大全被竊船隻疑  
爲碩寶如等聚賭所致業經出控乃不候緝訊得  
錢私和已屬不應且有應完漕糧延欠不納應從  
重照欠糧人戶違限一年以上律杖一百孫唐氏  
價買良家之女教演花鼓戲合依誘買良家之子  
爲優例枷號三個月杖一百徒三年以上軍流徒  
杖各犯事犯雖有在道光二十五年五月二十四

日清刑



恩旨以前者到官在後又有孀婦獨子親老丁單者情  
節較重均請毋庸查辦惟鮑奉莊年逾七十照律  
收贖孫唐氏並非良婦杖罪的決餘罪收贖其餘  
各犯分別刺字發配折責發落陸秀英自幼繼與  
蔣陳氏爲義女卽與乞養無異其被蔣陳氏抑勒  
賣姦例不坐罪與孫唐氏及所買教戲之幼女阿  
六阿八均照律分別離異歸宗遞籍給屬領回金  
大全未完漕糧飭縣追繳竊船正賊並王雙觀等

緝獲另結姜源等所得各贓照追入官同賭之人不能供指名姓並免查提賄具供棄免追前署蘇州府知府桂文燿署長洲縣知縣韓倬章署常熟縣知縣金鎔黃埭汛把總劉兆勇等均於

奏參後卽將首要各犯及兵役人等全數拏獲解究不使一名漏網尙知愧奮所有原參處分應請開復至顧寶如等在長洲境居家圩陸巷等處開賭窩娼姜源等得規包庇常熟縣差役繆淮開場聚

賭該縣營等失於覺察仍請交部議處其歷任失  
察各職名亦飭查明詳參除供招咨部外所有審  
明定擬緣由謹恭摺具

奏伏乞

皇上聖鑒勅部核覆施行謹

奏 道光二十六年二月十五日具

奏奉

硃批刑部議奏欽此

追補江蘇省三次清查案內第二十限完欠銀數

摺子

奏爲追補江蘇省三次清查案內第二十限完欠銀數恭摺奏祈

聖鑒事竊照江甯蘇州兩藩司所屬三次清查追補各款部議章程每年截數

奏報一次現屆查辦道光二十四年二十限完欠之期據署江甯布政使查文經署蘇州布政使郭熊

飛將追完銀數及限滿未完之員造冊詳

奏前來

臣

查江蘇省上屆十九次奏報江淮等屬尙

有未補銀九十九萬六千七百三十四兩零蘇松  
等屬尙有未補銀四十九萬六千七百九十六兩  
零今據冊報二十限截數江淮等屬其追完銀九  
百七兩零蘇松等屬其追完銀二萬二千五兩零  
現飭歸補原缺年款所有本省著追之武念祖未  
完上元等任官欠追賠銀兩統限無完先經草職

追辦迨該參員病故接准部咨行據原籍陝西省  
查明伊子武彬早已出外遊學不知確處移咨江  
蘇查追又經通飭挨查有無武彬下落嚴追取結  
核辦在案再酌提江蘇省羨餘彌補無著銀兩除  
蘇州藩司所屬業已按年提足外江省藩司所屬  
尙有道光五年未完銀二千五百五十一兩零六  
年未完銀四千三百一十二兩零七年未完銀二  
千二百二十八兩零八年未完銀七百八十七兩

零九年未完銀一千六百一十一兩零十年未完  
銀一千三百七十八兩零十一年未完銀六百六  
十六兩零十二年未完銀一千九百三十九兩零  
十三年未完銀二千八百七十兩零十四年未完  
銀五千二百三十三兩零十五年未完銀五千七  
百六十六兩零十六年未完銀五千三百三十三  
兩零十七年未完銀六千七百三十三兩零十八  
年未完銀六千七百六十六兩零十九年未完銀

七千四百五兩零二十年未完銀六千九百六十  
八兩零二十一年未完銀七千三十三兩零二十  
二年未完銀七千八十九兩零二十三年未完銀  
七千一百六十六兩零又江蘇兩屬原報有着續  
歸無著各款江藩司所屬冊報共銀二十二萬五  
千五百一十五兩零蘇藩司所屬冊報共銀二十  
二萬一千四百九十一兩零應俟原報無著提補  
清楚之後再行照案接續提補除飭查造員名銀



數清冊專案送部核辦外所有江蘇省三次清查  
案內二十限追補銀數緣由謹會同兩江總督  
壁昌恭摺具

奏伏乞

皇上聖鑒謹

奏 道光二十六年二月十五日具

奏奉

硃批戶部知道欽此

奏請給還吳縣李蒙泉等頂帶摺子

奏爲限緝賊犯業已拏獲懇

恩給還原參頂戴恭摺奏祈

聖鑒事竊照江蘇學臣張芾之家人吳瑾坐船於道光

二十五年十月初一夜在蘇州胥門馬頭被賊行

竊拒捕未經成傷一案當經臣璧昌會同前護撫

臣文柱將巡緝不力各員據實

奏參欽奉

諭旨吳縣知縣李蒙泉典史王灝楓橋汎干總楊同軌  
外委劉兆麒均著先行摘去頂帶勒限一個月嚴拏  
賊匪務獲究辦倘逾限無獲卽著從嚴參辦勿稍姑  
容欽此轉行欽遵去後茲據藩臬兩司轉據蘇州府  
詳稱此案經李蒙泉等於十一月初二日獲犯小  
朱老林胖二名訊係小朱老起意糾同林胖及在  
逃之韓老行竊小朱老護賊拒捕將該犯等照例  
擬以軍徒并請

奏懇給還李蒙泉等頂帶前來查此案前因胥門馬頭距省咫尺賊匪三人胆敢行竊學政隨船失賊八十兩零拒捕雖未成傷巡緝實屬不力臣壁昌等是以從嚴

奏參今該員等於一月限內獲犯過半兼獲首犯僅止夥犯一名未獲尙知愧奮按例應免議處合無仰懇

天恩俯念拒捕賊犯業已拏獲可否准將吳縣知縣李

蒙泉吳縣典史王灝楓橋汎干總楊同軌外委劉  
兆麒一併給還頂帶之處出自

鴻慈除將小朱老等供招咨部核覆并勒緝逸犯務獲  
外謹合詞恭摺具

奏伏乞

皇上聖鑒訓示謹

奏 道光二十六年三月初三日具

奏奉

硃批另有旨欽此內閣奉

上諭壁昌等奏限緝賊犯業已拏獲請將原參各員給  
還頂帶一摺江蘇吳縣知縣李蒙泉典史王灝楓橋  
汛千總楊同軌外委劉兆麒前因賊犯拒捕巡緝不  
力當經降旨將該員等摘去頂帶勒限嚴拏茲據該  
督等奏稱該員等於被參後限內獲犯過坐兼獲首  
犯尙知愧奮李蒙泉王灝楊同軌劉兆麒均著給還  
頂帶餘著照所議辦理該部知道欽此

附奏畱省知縣飭令到任片子

再新選蕭縣知縣徐海珍上年到省後因係捐納  
初任人員遽令赴任恐難經理裕如臣文柱會同

臣璧昌

奏請畱省練習數月再行斟酌辦理在案茲據藩臬  
兩司會詳該員畱省以來派令隨同審理案件聽  
斷尙屬明白吏治亦臻熟悉堪以飭令赴任等情

請

奏前來臣等覆查無異除批飭遵照外謹合詞附片

陳明伏乞

聖鑒謹

奏

硃批覽欽此



奏請湊撥兵餉摺子

奏爲江省兵餉不敷請於軍需餘剩銀內湊撥濟用  
恭摺奏祈

聖鑒事竊照江甯所屬各標營丙午年官兵俸餉除春  
季銀兩先准部撥本省乙巳年應徵地丁銀一十  
四萬兩外其夏秋冬三季共需銀四十五萬八千  
七十三兩零續准部咨指撥本省乙巳年未完地  
丁銀一十萬八千七十三兩零丙午年應徵地丁

銀一十萬兩又兩淮丙午年應報鹽課銀二十萬  
兩蘇州乙巳年未完地丁銀五萬兩等因當經行  
司分別撥解去後茲據署江甯布政使查文經詳  
稱江省地丁因連年災歉多有緩徵其餘熟田銀  
兩僅堪支應春季兵餉及年例經費河工一切之  
需所有夏秋冬三季奉撥乙巳丙午兩年地丁銀  
二十萬八千七十三兩零實屬不敷指撥查有

奏畱浙江軍需餘剩銀四十八萬兩又軍需餘剩銀

一百二十七兩零本係撥歸善後支銷因善後統  
歸捐辦是以有此節省之款雖奉部文行令解京  
第前項餉需攸關兵食與其輾轉協撥或致稽遲  
不若就近動支俾歸便捷應請在於軍需餘剩款  
內如數湊撥實於公事有神等情詳請具

奏前來

臣

等伏查兵餉係待支緊款刻難缺誤既據

查明本省地丁不敷濟用應請准其在於軍需餘  
剩項下撥銀二十萬八千七十三兩零以免另

行撥解之煩除咨部查照外謹合詞恭摺具

奏伏乞

皇上聖鑒謹

奏 道光二十六年三月初三日具

奏奉

硃批戶部議奏欽此

特參疎防盜案各員摺子

奏爲特參疎防情重盜案之文武印捕各員請

旨一併摘去頂帶勒限緝拏恭摺奏祈

聖鑒事竊照近年以來江蘇地方盜劫時聞節經臣壁

昌會同各前任撫臣嚴飭緝拏臣李星沅到任後

又經查案通飭議立章程設法巡防并於地方文

武各官謁見時諄切告誡至再至三乃現據武進

縣詳報道光二十六年二月初七日夜離城六十

里之石橋鎮地方李祥和典鋪被盜撞門入室拒捕刃傷典夥余士傑刦去當貨因更夫鳴鑼喊捕盜匪將火煤撩在棉花房內延燒貯貨房屋三進等情臣等查石橋鎮地方雖無墩鋪防兵而離汛僅止半里盜匪膽敢肆刦放火冀阻救援不法已極該管汛弁當更夫鳴鑼喊捕之時並不跟踪追捕該縣於事主報案後已逾半月尙無一犯緝獲實非尋常疎防可比除飭將被刦被焚各贓澈底

查明照例辦理并由臣壁昌飭營將疎防之把總陳浦沅外委宋大忠先行棍責外據藩臬兩司轉據該管道府揭報前來相應請

旨將文職印官署武進縣事候補知縣施燕辰捕官小河司巡檢諸憲曾武職專汎孟河營把總陳浦沅協防外委宋大忠一并摘去頂帶勒限緝拏倘疎防限滿仍無正盜真賊拏獲卽行另摺

奏請分別革職枷號留緝以爲捕務廢弛者戒臣等

謹會同江南提督臣尤渤恭摺具

奏伏乞

皇上聖鑒訓示謹

奏 道光二十六年三月初三日具

奏奉

硃批另有旨欽此奉

旨這所參疎防情重盜案之江蘇署武進縣事候補知縣施燕辰小河司巡檢諸憲曾孟河營把總陳浦沅



協防外委宋大忠著一并摘去頂帶勒限緝拏倘限  
滿仍無弋獲卽行奏請分別革職枷號留緝以重捕  
務而靖地方欽此

奏請開復宜興縣謝克一頂戴摺子

奏爲知縣短解錢糧已經解足分數請

旨開復頂帶仰祈

聖鑒事竊照前任宜興縣知縣謝克一經徵道光二十

五年上忙地丁錢糧完解不前先經護撫臣文柱

會同督臣璧昌彙摺

奏請摘去頂帶勒限完解在案茲據署蘇州布政使

郭熊飛詳稱該令任內短解錢糧現已批解足數

尙屬自知愧奮請將摘頂之案

奏明開復等情前來

臣

查謝克一短解上年地丁錢

糧於被參後完解足數與始終怠玩者有間相應  
恭懇

聖恩俯准將前任宜興縣知縣謝克一開復頂帶以觀

後效謹會同兩江總督

臣

璧昌恭摺具

奏伏乞

皇上聖鑒訓示謹

奏 道光二十六年三月初三日具

奏奉

硃批另有旨欽此內閣奉

上諭李星沅奏請開復知縣頂帶一摺前任江蘇宜興縣知縣謝克一經徵二十五年上忙地丁錢糧完解不前曾經降旨摘去頂帶茲據該撫奏稱該縣現已批解足數尙知愧奮謝克一著准其開復頂帶該部知道欽此

附奏現辦清查大概情形片

再江蘇四次清查一案經前撫臣孫善寶奏奉

諭旨給予兩年限期當卽行司欽遵設局查辦臣抵任

三月節經疊次飭催復就所擬章程冊式及仿照

上屆成案量爲變通之處悉心參酌竊以江蘇錢

漕重大庫款繁多卽常年徵解畱支正雜捐攤各

項鉤稽已非易事况自三次清查歷今二十餘載

官非一任事非一時彼此推延先後套搭尤難悉

數卽向來清查欠項有官欠有民欠有官墊民欠  
又有書役欠等名目自當分年分任挨次清釐溯  
委窮源水落石出不必迫之時日而必綜核之無  
遺不必繩以科條而必

帑項之有著此次辦理大要一在劃清界限州縣正  
署迭更多者十餘員少亦數員不等誠恐不肖者  
藉此清查或將本任之動缺誘諸舊令未交或將  
前任之實存作爲現在籌墊非清界限不足以杜

牽混也一在根究侵虧州縣身任地方潔已奉公者固不乏人而假公濟私亦難保必無其事若徵存未解之款而謬以爲民欠卽虧那緩帶之項而捏以爲分攤非究侵虧不足以防支飾也一在核實追繳州縣經管銀項如無侵蝕重情有著者照數勒交無著者始議籌補先以有官有人分起酌定期限現在服官本省者未經定案以前准其設法措完其已經離省與子孫出仕者亦於定案後

一律限催歸款非此則追繳無實際也一在杜絕  
續虧州縣遇有交代例須倉庫依限盤清而積久  
弊生遂多有名無實於是原價移交者有之流攤  
列抵者有之議單欠票者有之前任既通融接收  
後任復轉相仿效應自道光二十五年起以交代  
爲盤查以二參爲限制而尤以嚴提存庫使之無  
可騰挪非此則續虧無窮期也上年欽奉

恩旨豁免民欠錢糧多係清查案內之款臣現經諄飭



兩藩司趕緊辦竣先行具

奏請豁容再督同局員速將清查事宜認真釐剔凡  
歷過交代者以會核印冊爲憑其未歷交代者以  
底冊串簿爲斷務使各歸各任次序不淆孰少孰  
多分毫不爽俟查明虧缺確數卽行追溯的虧之  
人推究致虧之由分別因公因私是侵是那據實  
奏明辦理並經通飭司道將各屬道光二十五年以  
後徵存各項錢糧按期掃數提解復責成接任之

員遵照例限盤查不准仍蹈前轍臣惟有堅持定  
見勉竭愚誠率屬妥慎經理以期清源截流仰副  
皇上整飭地方之至意所有現辦清查大概情形理合

附片上

聞謹

奏

硃批認真妥辦欽此